

摘藻堂四庫全書薈要

集部

欽定四庫全書薈要卷一萬五千五百四十五

集部

劔南詩彙卷五十五

宋 陸游 撰

記東村父老言

原上一縷雲水面數點雨夾衣已覺冷秋令遽如許行  
行適東村父老可共語披衣出迎客芋栗旋烹煮自言  
家近郊生不識官府甚愛問孝書請學公勿拒我亦為  
欣然開卷發端緒講說雖淺近於子或有補耕荒兩黃

犢庇身一茅宇勉讀庶人章淳風可還古

試筆

用筆如用人利鈍烏可常必欲責其全無乃廢所長宣  
城與晉陵聲價略相當不知今何年森然集龜堂和墨  
若墜黑擣紙如銀光心手適調一運此紫毫鉞前却俱  
稱意六驥馳康莊聊復取一快詎必師鍾張

曠懷

曠懷何帝等沙鷗外物相挺劇火牛若信本心無一事

始知平地起閒愁每逢達士惟長歎欲棄浮生尚小留  
今旦微霜好風日短筇且領鏡湖秋

夢行小益道中

棧雲零亂馱鈴聲驛樹輪囷樺燭明清夢不知身萬里  
只言今夜宿葭萌

又

櫟柳林邊候吏迎血塗草棘虎縱橫分明身在朝天驛  
惟欠嘉陵江水聲

秋樹

秋風一夜吹橋樹  
明日來看已非故  
吳中九月霜尚薄  
落葉半隨飛鳥去  
老人心事感凋零  
只欲逢秋醉不醒  
范寬用意真難解  
偏寫丹楓作畫屏

雜感

鶴乘軒車已堪歎  
孤戴髑髏何可親  
勸君一笑掃除盡  
來作人間百歲人

又

讒口安能作禍基  
吾曹興廢豈無時  
向來何事令公怒  
問著渠儂自不知

又

難危寧度瘦驢嶺  
奔走莫隨肥馬塵  
困阨終身元自好

可怜癡子恨無津

瘦驢嶺在施黔間前輩  
或有作驢瘦嶺蓋誤也

又

一尊易致蒲萄酒  
萬里難逢鸛鵲樓  
何日羣胡遺種盡

關河形勝得重遊

又

老境睡多行立少浮生會少別離多  
安得此身重壯健  
一盃朋舊共高歌

又

苦熱惟憂不復涼轉頭忽已見清霜  
道人若悟無寒暑  
墮指流金總道場

柳橋秋夜

帝青萬里月輪孤掃盡浮雲一點無  
正是吾廬秋好夜

上橋渾不要人扶

訪隱者不遇

秋高山色青如染寒雨霏微時數點蘭亭在眼久不到  
每對湖山輒懷歎雅聞其下有隱士漠漠孤煙起松崦  
獨攜拄杖行造之枳籬數曲柴門掩笛聲尚近人已遯  
日啜薄糜終不貶何如小住共一尊山藜野芋分猿嘯

蒼檜

北風捲野天晝晦雨如弩鏃穿屋背老夫下牀行躡屐



稚子抱書坐持蓋豈無長楸與巨竹幹折枝摧共顛沛  
孰能不動安如山屹立庭前獨蒼檜

農家歌

村東買牛犢舍北作牛屋飯牛三更起夜寐不敢熟茫  
茫陂水白纖纖稻秧綠二月鳴搏黍三月號布穀為農  
但力作瘠鹵變衍沃腰鎌卷黃雲踏碓舂白玉八月租  
稅畢社瓮釀如粥老稚相扶攜閭里迭追逐坐令百世  
後復覩可封俗君不見朱門玉食烹萬羊不如農家小

甌吳梗香

君子非好異

君子非好異本意亦從衆居然迫所媿難復趨一閔孟軻遇齊王夫豈不欲用萬鍾養弟子乃似以利動惟其有辭受百世尊道統豈惟聖賢哉學者固所共

獨登東巖

早慕功名已絕癡晚耽筆墨愈無奇牧羝未乳身先老化鶴重歸語更悲朋舊在亡成斷夢山河興廢入孤吹

悠然獨倚闌干笑又過簪萸泛菊時

灌園

八十身猶健生涯學灌園溪風吹短褐村雨暗衡門  
正魔君怖心安疾豎奔午牕無一事梨棗弄諸孫

晨起

老尚貪書課黎明即下床不驚天乍冷更覺意差強  
蟾滴初添水螭爐旋炷香浮生又一日開卷就牕光

龜堂

莫笑龜堂老殘年所得多賦詩傳海估說法度天魔天  
矯竹如意鱗皴松養和拈來示諸子無事數相過

蜀漢

蜀漢崎嶇外江湖莽蒼中冷官家世事獨立古人風已  
老學猶力久窮詩未工悠悠千載後此意與誰同

客有言太山者因思青城舊遊有作

我登青城山雲雨顧在下月色縞巖谷欲睡不忍捨明  
朝下半嶺頗怪哀湍瀉山麓雲未歸平地泥沒踝乃知

宿處高所恨到者寡有客談泰山昔嘗宿石室夜分林  
采變暘谷看浴日九州皆片塵盛夏猶慘栗我聞思一  
往安得飛僊術但願齊魯平東封扈清蹕

遊近村

度塹穿林脚愈輕憑高望遠眼猶明霜凋老樹寒無色  
風掠枯荷颯有聲泥淺不侵雙草屨身閒常對一茶枰  
茆檐蔬飯歸來晚已發城頭長短更

疎雨

檐間秋雨時一滴絕似漢嘉方響泉不聽此聲三十載  
夢回搔首一凄然

秋曉

管席多年敗見經布衾木枕伴殘更啞啞天際鴈初度  
喔喔舍傍雞亂鳴貸米未回愁竈冷讀書有課待聰明  
一秋最恨空堦雨滴破羈懷是此聲

癸亥初冬作

開歲忽八十古來應更稀我存人盡死今是昨皆非愛

酒陶元亮還鄉丁令威目前尋故物惟有釣魚磯

兀坐久散步野舍

湏洞風號木蕭條雨滴堦忽思穿兩屐聊用散孤懷赤

脚春畬粟平頭捨澗柴先師有遺訓萬事忌安排

胡翼之先

生教徐節孝  
曰莫安排

法雲寺

不到法雲久秋高初一來厨供菰白美池蘸水紅開橋

畔逢遊衲雲邊數過梳同遊恨歸早珍重約尋梅

小徑登東山繚行自西北至溪上

是夕子  
韋置酒

行穿犖确度谿研小立風中客袖斜衰草雙雙點飛蝶  
長空一一送栖鴟荻洲薄暮收魚網茆舍初寒響緯車  
誰道老人多感慨未妨尊酒樂年華

### 美睡

老來胃次掃崢嶸投枕神安氣亦平漫道布衾如鐵冷  
未妨鼻息自雷鳴天高斗柄闌干曉露下雞埒膈膊聲  
俗念絕知無起處夢為孤鶴過青城



逆旅

秋晚南山行小蹇就店秣我亦念少休無奈市兒聒嗟  
爾亦坐飢錙銖苦爭奪其心計亦厭陷溺無自脫我欲  
救其本汝勿謂迂濶要傾江海大一洗錐刀末人生顧  
須幾卒歲惟一褐有地即可耕何山不堪活

東園

今日天霽霜又見一日晴晴寒病良已扶杖東園行瓦  
鼓息我倦靜聽幽鳥鳴花菓四十株手自培養成疎密

無行列東園蓋強名人看不滿笑聊用適我情

雜感

買薪貸粟不曾知一事無營盡日嬉  
耄老却如童稚日  
早眠晏起食無時

又

古言忍字似而非獨有癡頑二字奇  
此是龜堂安樂法  
大書銘座更何疑

又

平生所聞宋華子病忘乃與知道鄰老夫歷盡世間事  
始覺此公真可人

又

羲皇一晝開百聖學者即今誰造微文詞害道第一事  
子能去之其庶幾

渡頭

蒼檜丹楓古渡頭小橋橫處繫孤舟  
范寬只恐今猶在  
寫出山陰一片秋

小飲賞菊

菊得霜乃榮性與凡草殊我病得霜健每却稚子扶豈  
與菊同性故能老不枯今朝喚父老采菊陳酒壺舉哀  
舞翩僊擊缶歌烏烏秋晚遇佳日一醉詎可無

與兒輩小集

老子秋來樂事稠吳杭新擣酒新菊矮黃不待園官送  
小白每煩溪女留頓飽可憐頻夢與半酣自喜有兒酬  
不如意事何窮已且放團樂一笑休

舍北晚眺

平野沉寒日遠村生暮煙離離立紅樹點點散烏捷暫  
出不逾歲告歸仍一塵江湖初見鴈著眼送雲邊

書室獨處欣然有詠

鑿空學道本無師歆盡狂心頗自竒閒坐始知冬日永  
高談未覺耄年衰治棺準備膏肓日釀酒枝梧雨雪時  
常笑祖龍癡到底一生辛苦覓安期

冬初至法雲

曉日曛曛露未乾  
東中十月始微寒  
牛閒處處農功畢  
米賤家家酒盞寬  
煙浦白鷗迎鼓枻  
漁村紅樹入憑闌  
歸舟莫恨無人語  
手把陶詩側臥看

感憤

形勝峭潼在英豪  
趙魏多精兵連六  
郡要地控三河慷  
慨鴻門會悲傷易  
水歌幾人懷此志  
送老一漁蓑

記老農語

霜清楓葉照溪赤  
風起寒鴉半天黑  
魚陂車水人竭作

麥壠翻泥牛盡力碓舂玉粒恰輸租籃挈黃雞還作質  
歸來糠粃常不饜終歲辛勤亦何得雖然君恩烏可忘  
為農力耕自其職百錢布被可過冬但願時清無盜賊  
村舍

剥啄敲村舍了又揖主人新牆拆龜兆疎瓦斷魚鱗紅  
粒炊畬粟青煙鬱澗薪得床思熟睡寒犬苦信信

自述

偶策青驢出還將白鶴隨鍊丹留日觀采藥上天池送

客清秋棹留僧靜夜碁從來閒姓字不遣世人知

泊舟湖橋酒樓下

縹緲雲邊罨畫樓空濛雨外木蘭舟誰知老子清狂甚  
獨占城南十里秋

菴中雜書

蒲龕坐久暝如春紙被無聲白似雲除却放生并施藥  
更無一事累天君

又



謀生安用苦區區  
豆飯藜羹未遽無  
若使天年猶合活  
不妨自有穀於菟

又

萬物並作吾觀復  
衆人皆醉我獨醒  
走徧世間無着處  
閉門鋤菜伴園丁

又

茅茨一室有餘樂  
轍環四海誰知心  
輟耕壠上鴻鵠志  
長嘯山中鸞鳳音

連日暴下齟然不支戲作

老子心如行脚僧秋風久已辦行藤紙衾夜夜江湖夢  
小復遲留待判懲

大風

風大連三日衰翁不出門兒言卷茅屋奴報徹蘆藩狼  
籍鴉擠壑縱橫葉滿園藥除有今日紅日上東軒

野興

掃盡紅塵閉是非舍傍好在舊苔磯壺中春色松肪酒

江上秋風槲葉衣一片共知雲偶出千年誰識鶴重歸  
勿言野外無供給雪後連山藥草肥

又

樓蘭勛業竟悠悠聊作人間汗漫遊半谷雲霞丹竈熟  
一天雷雨斂池秋倘佯藥市經旬醉問訊巢仙數夕留  
却過故廬應一歎岸邊猶繫采菱舟

若耶村老人

昔聞若耶村意象乃物外皤然阡陌間來往幾貽背無

論百歲翁甲子數至再我來親見之殊未輟畊耒農事  
一一言多聞雜諄誨回頭指丁壯此是曾玄輩有翁又  
過我家有孫五代指呼取斗酒山果雜細碎顧我使云  
年慙縮不能對恭惟大父行不覺投杖拜養生惟一嗇  
此在吾術內翁能信踐之成就乃爾大我今纔耄及耳  
目已憤憤長庚雖餘輝敢與明月配

霜曉

霜有連愛白林無一葉青紙衾圍栗烈風響送東丁酒

盡尊餘滴灰深火撥星蓬窓了無事默坐養黃庭

山澤

我本山澤人散誕傲簪裳宦遊五十年天遣還農桑東  
西阡陌間吾亦愛吾鄉楚祠坐秋社隋寺觀夜場醉迷  
采蒼耳旅飯炊黃粱自疑太古民百年樂未央有時閒  
暇時頗復誦老莊亦嘗遊岷峨畧聞度世方氣為東道  
主主安客自長却後五百年見我灞城旁

遠遊

姓氏不須通從來號放翁月明登暑雪木落過秋風

成都

武擔山暑雪堂歸州巴東  
縣江上秋風亭皆絕景

處處題僧壁時時臥釣篷始

知侯萬里未必是英雄

### 北窓

破屋頽垣嘯且歌一窓隨處寄婆娑閱人每歎同儕少  
遇事方知去日多雲濕沙洲秋下雁雨來荻浦夜鳴鼃  
何時更續扁舟興剗載鄣筒醉綠蘿

綠蘿溪  
在武夷

### 醉題

目光炯炯射車牛何至隨人作浪愁  
身處江湖如富貴  
心親魚鳥等閒儔孤帆滅沒三湘曉  
野店荒寒二華秋  
醉墨不容塵土汙憑君試訪寺家樓

幽居

練褐藤冠物外裝下簾留住欲殘香  
瀟湘客過誇漁具  
鰲皖僧來說藥方詩未遽哀猶跌宕  
書雖小退亦軒昂  
不緣厭靜尋幽事老去無如白日長

連陰欲雪排悶

先生經旬甌生塵藜羹不污白氎巾魯連敢謂天下士

摩詰要是山中人

王維自稱  
山中

溪從灘瘦愈刻厲山自木

落增嶙峋雲重惟愁雪欲作梅花忽報一枝春

### 示子聿

古學真皇極淫辭斥異端人才如爾少老健及吾難身  
退桑榆暝家貧菽水歡人生麤足耳衣食不須寬  
項里溪上見珍禽曰溪鵲相隨數十步不去

涉溪來過東溪老斷枝槁葉紛如埽忽逢溪鵲昔未識



言語惺惚羽毛好異哉馴狎若可呼迹雖甚疎情有餘  
上穿蒼煙立高樹下踏白石窺遊魚老夫日日溪頭行  
見此不妨雙眼明定交物外從今始豈獨沙鷗可與  
盟

冬夜對書卷有感

人生如夢終當覺世事非天孰可憑萬卷雖多當具眼  
一言惟恕可銘膺所聞要足敵憂患吾道豈其無廢興  
白髮蕭蕭年八十依然父子短檠燈

項王祠

項里溪水聲潺潺溪上青山我髻鬟煙村人語虛市合  
石橋日落漁樵還堂上君王凜八尺大冠如箕熊豹顏  
築祠不知始何代典祀千載誰敢刪肅清亭障息剽奪  
埽蕩螟螣囚神奸范增玉斗久已碎虞姬粧面留餘潛  
小人平生仰遺烈近廟欲結茅三間時時長歌拔山曲  
醉倒聊慰窮途難

入城

宿凍迷車轍晨霜縞瓦溝路長休小驛風勁透重裘  
貿貿殘軀健芒芒去日遒親交喜握手隨處小遲留

出城

病鶴寒彌瘦孤松老不枯非關畏軒冕本自樂江湖  
古錦添詩句羸驂入畫圖兒孫候門久喚取倒殘壺

不入城半年矣作短歌遣興

我居城西南渺渺水雲鄉舟車皆十里來往道豈長  
今夏我來時天風吹荷香再來已孟冬慘然天實霜  
市南

兩株柳葉盡萌已黃乃知多事人歲晚虛悲傷名藍墮  
却火鞠為瓦礫場河橋比一新華表照康莊成壞莽相  
尋推理海茫茫疾豎造物兒吾手扼其吭砥柱天下險  
一葦乃可航養氣倘能全斯言豈荒唐

先大父以元祐乙亥寓居妙明僧舍後百餘年當  
嘉泰癸亥游復假榻一夕感歎成詠

楚公先去幾秋風巷陌蕭條舊隱空遺老即今無處覓  
斷香殘照淚痕中

志學

聖門志學豈能差  
山立方當斥百家  
早忝授經聞博約  
晚羞同俗陷浮華  
風髣髴面寒無褐  
雷轉饑腸飯有沙  
漫道哀慵貪睡美  
五更和夢聽城笳

晚行舍北

逆旅將歸客  
扶衰取次行  
霜濃木葉盡  
水落岸痕生  
鳬雁浮寒浦  
牛羊滿晚晴  
東村隔煙寺  
杳杳送鐘聲

幽居述事

曾會蘭亭醉墮簪後身依舊住山陰琴傳數世漆文斷  
鶴養多年丹頂深滌硯灘頭無漬墨吹簫月下有遺音  
小詩戲述幽居事後有高人識此心

又

頽然掩戶不妨奇又賦幽居第二詩大藥鼎成令虎守  
精思床穩用龜堵壺中自喜乾坤別局上元知日月遲  
更就羣童閒關草人間何處不兒嬉

又

落葉平溝日滿廊幽居又賦第三章喜無俗事干靈府  
恨不終年住醉鄉上樹榜船雖老健疏泉移竹亦窮忙  
山僧欲去還留話更盡西竺一炷香

又

舴艋東歸喜遂初頻拈枯筆賦幽居細燒柏子供清坐  
明點松肪讀道書蒼爪嫩芽開露茗紅根小把淪煙蔬  
年來自許機心盡頗怪飛鷗自作疎

十一月五夜風雪寒甚燃薪取煖戲作五字

束薪從澗底及此不時求力比鷺黃酒功如狐白裘分  
才具糜粥餘事煩衾裯復恐成驕惰三更起飯牛

魯墟

先太傅  
舊宅

魯墟無復壞垣存偶榜舟來入亂雲杜曲桑麻猶鬱鬱  
桃園雞犬亦欣欣青園舊墅千峯立綠引官河一脈分  
我卜數椽差不遠得歸何以報吾君

曉雪

遼湖誰琢玉為屏換却南堂萬疊青老子醉狂還自笑



持竿畫字滿中庭

又

觀雪剡溪天下馳題詩常恨不能奇  
未應便許凝之語此興何曾有盡時

養生

西遊曾受養生書晚愛煙波結草廬  
兩眸神光穿夜戶一頭胎髮入晨梳  
邀雲作伴遠忘返與鶴分窠寬有餘  
占盡世間閒事業任渠千載笑迂疎

夜讀鞏仲至閩中詩有懷其人

詩思尋常有偏於客路新能追無盡景始見不凡人細  
讀公奇作都忘我病身蘭亭盡名士逸少獨清真

獨意

酒似交情薄愁隨夜漏長常貧且撐拄多病不禁當偶  
讀書終卷閒臨帖數行翻憐市朝客擾擾為誰忙

十一月十三日夜作

風雪正相瘖蕭然一點燈擁爐蒙衲被就壁倚枯藤火

降神方王河潮腦自凝鄰雞太多事三唱請晨興

故人趙昌甫久不相聞寄三詩皆傑作也輒以長

句奉酬

海內文章有阿昌數能著句寄龜堂就令覲面成三倒  
未若冥心付兩忘道義極知當負荷風波那得易禁當  
相思命駕應無日且約陶然寓醉鄉

夢中賦早行

夜分秉炬治裝費千里霜風入馬蹄擁褐却尋孤驛夢

垂鞭時聽近村雞  
荒煙漫漫沉殘月  
宿莽離離上古隄  
天色漸分寒更力  
道傍沽酒圻官泥

兀兀

兀兀初何有  
偃偃不自知  
偶然登耄及  
便欲數期頤  
把釣秋風夕  
騎驢晚雪時  
江湖遊已徧  
更作灞城期

哺猿

有書常嬾讀  
有酒常嬾醉  
惟有默坐佳  
又以睡為崇  
不如捨之起  
扶杖來東園  
摘此幽澗菓  
哺我高枝猿  
食菓

飲清泉猿計亦何闕但恐夜霜時腸斷巴山月

與子坦子聿元敏犯寒至東園尋梅

北風吹人身欲僵老翁畏冷晝閉房梅花忽報消息動  
意氣山立非復常二兒一孫奉此老瘦藤夭矯凌風霜  
幽禽白頰忽滿樹似與我輩爭翱翔滿絕無聲凍地裂  
耿耿寒日青無光歸來相視不得語小榼一寫鵝兒黃  
示諸孫

蝸舍鷄衣老可哀衰顏時為汝曹開朱門莫羨煮羊脚

糲食且安羹芋魁家塾讀書須十紙山園上樹莫千回  
但令學業無中絕秀出安知有後來

題三壁

皤皤太平民堂堂大耋身乾坤一旅舍日月兩車輪  
簞貴超三品蔬甘敵八珍明年真耄矣爛醉海山春

又

力穡輸公上藏書教子孫追遊屏裘馬宴集止鷄豚  
寒士邀同學單門與議婚定知千載後猶以陸名村

雜言示子聿

福莫大於不材之木禍莫慘於自躍之金鶴生於野兮  
何有於軒桐爨則已兮豈慕為琴古今共戒玉自獻卷  
舒要似雲無心廬室但取蔽風雨衣食過足豈所欽我  
今餘年忽八十歸畊幸得安山林逢人雖歎種種髮入塾  
尚憶青青衿吾兒殆可守孤學相與竭力窮幽深

夜坐聞大風

天曠宮廬覆風豪野戰酣詩成非醉墨棊罷縱高談奇

怪空堪笑低摧亦未甘東浮雲海去會載酒千甌

歸老

歸老何妨駕鹿車平生風雪慣騎驢鬚毛白盡猶耽酒  
目力衰來轉愛書止足極知于道近癡頑更喜與人疎  
著身莫怪無閒處肺天台儘有餘

懷舊

扇子硯中有隱士清江一曲照柴荆當時舩急失一見  
至今空憶莫猿聲



又

青城之西谿谷聲道翁巢居獨鼓琴一盃松麴留我宿  
夜半虎嘯風生林

又

剡溪百里徹底清石闌千裏真人行大丹一粒擲溪水  
禽魚草木皆長生

劔南詩豪卷五十五


謹案卷五十五第十頁前一行小飲賞菊刊本飲

訛飯今改



總校官庶吉士臣張能照  
校對官庶吉士臣翟槐

謄錄監生臣姚鍾英



欽定四庫全書薈要

集部

劔南詩藁卷五十六  
七

詳校官助教臣謝登雋



欽定四庫全書薈要卷一萬五千五百四十六

集部

劔南詩藁卷五十六

宋 陸游 撰

道室雜詠

雙鳧杖化龍雲山回首不知重藥園夜嘯丹臺月  
酒市秋聽紫閣鐘  
宣但煙霄隨步武故應冰雪換形容  
小童開戶驚奇事野鷗來巢砌下松

又

莫怪先生閱事多人間何處不經過天山八月霜枯草  
暘谷三更日浴波酒熟春風歸掌握丹成神物共誰何  
散人本帶江湖號四百年來一釣蓑

又

身是秋風一斷蓬何曾住處限西東棋枰窓下時聞電  
丹竈巖間夜吐虹采藥不辭千里去釣魚曾破十年功  
白頭始悟頭生妙盡在黃庭兩卷中

偶與客飲客去戲作

多泥窮巷破節屋人不堪憂心自足有時負日向門前  
手把南華日中讀若教開門與客游擾擾依前懷百憂  
平生自計亦已熟惟有釣魚湖水頭舊聞仲長子光可  
與友瘖不能言但耽酒安得此友常過門一語不交傾  
數斗

故里

故里淳風比結繩歸畊況遇歲豐登已侵鐘漏行安往  
略有園廬退可憑萬事寧容媿天地一心常若蹈淵冰



區區僻見君無怪人固終身有不能

齟齬

人生天地間本非金石堅  
沉復歷歲久蠹壞無復全齟  
齬雖小疾頗解妨食眠  
昨莫作尤劇頰輔相鈎連欲起  
嬾衣裳欲睡目瞭然恨不棄殘骸  
蛻去如蛇蟬或當學金丹揮手凌  
雲煙逢師定悠悠丹成在何年

冬夜

悠悠孤夢伴餘醒  
窓下寒燈點闇明  
雪意欲成風正惡

漁舟忽過雁羣鳴志哀但有徂年感身沒應無後世名  
猶幸耄期身龐健天公元不負書生

枕上

鐘鼎初何有山林亦足雄行思絕大幕歸但醉新豐雁  
過荒寒外燈殘寂寞中蒼顏無鏡對那覺是衰翁

寒暑

寒暑侵陵日夜哀坐令齒髮不支持愛憎徇物去忘反  
神氣養形誰復知布帛九條晨入靜柏床五尺夜精思

舊交勿恨江湖別雲海神山會有期

長溪東山容老索月谷幽賞詩

人間底處無明月只看青山為發揮  
林裏枝寒無鵲立水邊路白有僧歸

石月谷

清泉白石君家物美竹名花可旋移  
幽賞定知隨處勝更須時展放翁詩

石幽賞

梅

若耶溪頭春意慳  
梅花獨秀愁空山  
逢時決非桃李輩  
得道自保冰雪顏  
仙去要令天下惜  
折來聊伴放翁閒  
人中商畧誰堪比  
千載夷齊伯仲間

歲晚幽興

梅出疎籬柳拂池  
流年已迫早春時  
壯心卓犖猶欺酒  
老業呻吟未廢詩  
眼暗觀書如棘澁  
齒踈噉飯似牛呬  
風爐欲試蒼鷹爪  
自向林間拾墮枝

又

殘年欲遂迫期頤追數朋儔死已遲卜塚治棺輸我快

染鬚種齒笑人癡

近間有醫以補種墮齒為業者

野梅墮地草生後街

柳拂鞍冰泮時滿眼雲山不須買剝傾新釀賦新詩

又

萬里風波行路難君恩尚許綴祠官中庭鬱鬱藥苗長  
絕壁颼颼松吹寒泥巷有人尋杜甫雪廬無吏問袁安  
清晨對鏡增幽致龜屋新栽二寸冠

又

短鬢元知不久青  
況開九帙數餘齡  
全家共保一忍字  
累世相傳三住銘  
時泛孤舟過梅市  
却穿雙屨上蘭亭  
擁爐莫恨無僧在  
滿院松風要細聽

先太傅親受三住銘于施肩吾先生

授游曰汝具累世相傳母忽因即以傳聿虞諸子

### 寄題胡基仲故居

憶昔公來一束書  
蕭然不復畜僮奴  
浮雲每歎成蒼狗  
空谷誰能繫白駒  
才氣沙塵埋巨闕  
文章林壑吼於菟

旅墳三尺雲門寺又見離離長綠蕪

雪夜

雪聲如飛沙風聲如翻濤三更天地闇雪急風愈豪頗  
疑虛空中鬼神戰方鏖勝負要一決利兵未肯櫜我如  
墮重圍百計無由逃僵縮不能寐坐起擁故袍自歎老  
益貧庭草常不孳惟酒不憚費貸券如山高園蔬甘且  
柔味不減豚羔醉此風雪夕聊慰抱瓮勞

聽雪為客置茶果

病齒已兩旬日夜事醫藥對食不能舉況復議盃酌平生外形骸常恐墮貪著時時隣曲來尚不廢笑譁青燈耿窓戶設茗聽雪落不釘粟與梨猶能烹鴨脚

獨夜

燈花寒自結雪片夜方深瘦影參危坐清愁入苦吟江湖身汗漫藥石病侵尋朋舊凋零盡何人識此心

寄題王才臣山居

王子自少無他娛求佳山林結草廬頭童齒豁已哀矣



衣弊屢空常晏如出遊恥懷襴衡刺歸臥盡讀倚相書他  
日叩門傾白墮要看著句到黃初

夜賦

練色亭臯月江聲水杪風開書燈煜煜傳漏鼓鼕鼕流  
落諸生老呻吟四壁空生涯君勿笑淡話有兒同

雪後

雪後晴初快春前日漸長菊根萌已動梅蕊意先香禽  
語驚幽枕冰消漲野塘衰殘難出戶不是嬾衣裳

又

冰開地沮洳雲破日曛曛  
鴻入青冥際草生殘燒中  
方欣畢公稅已復始農功  
稻壠牛行處泥翻夕照紅

寒夜讀書

老去無他嗜書中有獨欣月  
窓雞喔喔霜野犬狺狺雖  
嘆吾何適猶尊昔所聞  
從今倘未死一日亦當勤

對食戲作

霜餘蔬甲淡中甜  
春近靈苗嫩不斂  
采掇歸來便堪煮

半銖鹽酪不須添

又

白鹽赤米了朝鋪  
勑項何妨煮瓠壺  
一種是貧吾尚可  
隣家稗飯亦常無

又

春前臘後物華催  
時伴兒曹把酒盃  
蒸餅猶能十字裂  
餛飩那得五般來

又

枰欄子嫩供香飯  
皂莢芽新簇冷淘  
常使先生飽捫腹  
其餘萬事一秋毫

又

冰壺欲著先生傳  
髯簿卑凡豈得書  
常恨當年定交晚  
枉教渴死老相如

又

黃昏來扣野人扉  
笑語欣欣意不遲  
葑火正紅煨芋美  
不妨秉炬雪中歸

甲子立春前二日作

頭風初愈喜身輕  
書卷時開覺眼明  
養熟犬雞隨坐起  
性靈烏鵲報陰晴  
韭菘釘餠春盤好  
芝朮篴和臘藥成  
自笑衰殘殺風景  
燈時不擬入重城

家居自戒

曩得京口俸  
始卜湖邊居  
屋財十許間  
歲久亦倍蓰  
初藝花過百本  
嘯咏已有餘  
猶媿先楚公  
終身無屋廬

又

平居少愧怍動以直自遂雖墮虎兇羣我已無死地神

仙果可學

道藏有神  
仙可學論

吾輩恐差易勿言聞道晚努力補

黥劓

又

世人無奈愁沃以杯中酒未能平磊砢已復生堆阜治  
水不治源九載亦何有不如讀周易一卷常在手

又

疾病當治本神醫古難遭哀哉有限身日與利慾塵大

爵徒為貪劇飲豈足豪淡薄以養壽亦非慕名高

又

飢寒臨侵暴其實可憐傷一事百自反忿心冷如霜  
物學者心省事慮亦長吾過固多矣責彼何暇詳

又

霜嚴雞報晨月落犬警盜遺粒與棄糠每媿不足報  
奴事樵汲跣婢勤爨竈有過姑教之箠楚置勿道

感貧

經歲無兼味窮冬止破裘翁將貧博健兒以學忘憂士  
固安天命吾寧為食謀八荒如可望時亦上高樓

鄰曲

濁酒聚鄰曲偶來非宿期拭盤堆連展

淮人以  
名麥餌

洗鬴煮

黎祁

蜀人以  
名豆腐

烏特將新犢青桑長嫩枝豐年多樂事相

勸且伸眉

送客

有客相與飲酒盡惟清言坐久飢腸鳴殷如車輪翻烹



栗煨芋，鮓味美，敵熊蹯。一飽失百憂，抵掌談羲軒。意倦客辭去，秉炬送柴門。林間鳥驚起，落月傾金盆。

夜寒起坐待旦

懔懔不成寐，攬衣寒夜中。青熒煨芋火，鞞鼓簾風卷。

犬聲如弱

見王維與裴迎書

山童首似蓬，悠然束書坐。徐待日

生東

信手翻古人詩隨所得次韻

病起瘦可驚，峻嶒夜窓影。八十遂當至，何止踐衰境。食

簞幸能盡藥裹亦已屏汲泉煮日鑄舌本味方永士苦不自晦常若錐見穎叔度獨何人長陂渺千頃

石夜坐

孔門春服成弟子從沂浴老氏坐中庭莊生記新沐古聖自潔清如日浴暘谷豈比流俗人蟣蝨生桎梏老人喜時節良夕當爆竹未濯三生垢湯沐意亦足豈惟寓蕭散亦以洗榮辱悠然獨酌罷投枕睡已熟

石除夜沐浴

甲子歲元日

飲罷屠蘇酒真為八十翁  
本憂緣直死却喜坐詩窮  
米賤知無盜雲露又主豐  
一簞那復慮嬉笑伴兒童

開歲殺陰不  
雨法當有年

初春書懷

六十餘年慕古人即今方近葛天民  
見人各是元非怨遇事皆安豈怨貧  
小圃鉏耰聊過日扁舟煙雨尚關身  
出門未覺龍鍾在禹廟蘭亭又見春

又

老及光陰古更稀自今惟有數期頤  
食觀本草雖多事  
醉讀離騷自一奇物外有人閒始見  
山中可樂老方知  
武陵好在桃千樹短櫂相尋亦未遲

又

數掩蘆藩並水居一家全似業樵漁  
春寒例謝常來客  
老病猶貪未見書馴雀正緣拋食慣  
芳蘭肯為礙門鋤  
藥苗滿鉢無人共賴有溪僧為破除

又

甫及春初日已長偶同鄰曲集山房囊盛古墨靴紋皺  
箬護新茶帶勝方老境不嫌來冉冉流年直恐去堂堂  
清泉冷浸疎梅蕊共領人間第一香

又

底處人間無駭機超遙且喜謝招麾千年澗底孤松秀  
萬里天邊獨雁歸服氣昔常憎火食遊山近已製荷衣  
青城況有幽人約會守丹爐隱翠微

又

納祿貧如筮仕初歸來依舊卧蝸廬半池墨潘臨章草  
一盤松肪讀隱書長鑱僅供饑子美清江不療渴相如  
耄期自許詩情在雪裏猶能跨蹇驢

又

愚公不解計安危行盡人間惡路岐難似車登蛇退嶺  
險如舟過馬當祠平生憂患常難測送老安閒敢自期  
一事不成應有命惟將知止報明時

初春紀事

窓櫺無日影庭樹無風聲微雲淡天宇非陰亦非晴  
美哉豐年祥入我屠蘇觥父老亦共喜驩言叩柴荆一飽  
已有期惟當力春畊遣兒牧雞豚作社賽西成

又

經冬少雨雪所至苦水涸園蔬葉多蠹山步船半閣入  
春一再雨喜氣滿墟落又聞湖邊路已破小桃萼一尊  
儻可攜父子自醺酢

送子虞吳門之行

相送何由插羽翰  
淡煙微雨暗江干  
孤懷最怯新春別  
病骨難禁昨夜寒  
尊酒汝寧嫌魯薄  
釜羹翁自絮吳酸  
此詩字字俱愁絕  
忍淚成篇却怕看

法雲僧房

八十衰翁有底忙  
水邊山際亦張張  
清溪橋斷舟橫岸  
小塢梅殘雨漬香  
數點青燈經野市  
一爐軟火宿僧房  
自嫌尚有人間念  
却為春寒怯夜長

陌上



陌上長歌任笑狂此生得喪畧相當天將老齒償負悴  
身坐虛名掇謫傷溪水漸生朱舫活野梅半落綠苔香  
新晴快上蘭亭路莫待春殘始一觴

獨立

白髯蕭颯一愚公獨立濛濛細雨中羊踏寒蔬新少夢  
魚生空釜久諳窮殘編幸有聖賢對閒話豈無隣曲同  
街鬻才名非老事小詩信筆不能工

春陰

數間茅屋傍楓林常負平生萬里心老去逐年增老病  
春來無日不春陰麴塵蘸岸波初漲猩血團枝色已深  
欲到東園還嬾起却和殘睡聽鳴禽

閒味

身似枯禪謝世塵豈容收斂強冠巾庾郎三韭不妨飽  
晏子一裘何恨貧栖冷每憐雞唱早雲開初見月痕新  
閒中有味君知否熊掌駝峯未是珍

聞北亂代華山隱者作

滿谷松風枕石眠中原戰血又成川但思秦鑄銅人日  
不記齊成柏寢年大藥一爐燉晚日孤桐三尺寫秋泉  
何妨狂舞旗亭下乞與人間畫醉仙

春日

車馬間中絕衣襦病後寬改詩消晝永賒酒敵春寒柳  
細搓難似花新染未乾歸鴻與來燕各自管悲歡

寄子虞

十里城南路蕭然一秃翁舊書哀易忘新句嬾難工山

色春寒淡溪流宿雨通街頭有良醞思汝一尊同

送子坦

老境寧容別諸兒仕為貧一春多卧病幾度送行人五  
斗方須祿千金且愛身長安雖可樂憐汝正思親

送子適

初欲赴春銓以兄弟皆出故輟行

隔一濤江路豈遙躊躇不覺欲魂銷寄書勿遣過三日  
發渡何曾無兩潮睡少不闕茶作祟愁多却賴酒時澆  
柯橋西畔夕陽岸誰為離人惜柳條

醉眠初起書事

身世元知似斷蓬  
流年分付酒盃中  
飢寒未解士先老  
風雨欲收花已空  
泥補舊巢梁燕喜  
水生支港釣船通  
睡魔正費驅除力  
隔竹敲茶賴小童

見蜂采檜花偶作

來禽海棠相續開  
輕狂蛺蝶去還來  
山蜂却是有風味  
偏采檜花供蜜材

對酒戲詠

不管詩人大瘦生但念酒徒稀醉眠憑誰為畫畢吏部  
縛著隣家春瓮邊

又

長安市中多美酒一斗財當三百錢堪笑書生消幾許  
有錢十萬醉經年

夜興

梟呼作人聲月出如野燒推枕中夜起殘燈尚餘照難  
從公榮飲獨效孫登嘯八十推不僵平昔宣所料空廊

病馬臥枯草老牛噉明朝語俗人與汝不同調

老甚自詠

殘年真欲數期頤一事無營飽即嬉身入兒童鬪草社  
心如太古結繩時騰騰不許諸人會兀兀從嘲老子癡  
亦莫城中買鹽酪菜羹有味淡方知

又

羨生常笑古人癡俛仰那知迫耄期鏡裏鬢無添白處  
尊前顏有暫丹時客瞋終歲常稱疾兒訝經旬嬾賦詩

枉却愁過强健日身閒何往不熙熙

夜過魯墟

晡時發柯橋申夜過魯墟燈出籬落間七世有故廬門  
低不容駟壁壞亡遺書高樹宿羈鳥廢沼跳驚魚移舩  
過古埭水面涵星疎安得病良已畢世澆春蔬

園中小飲

造物佚我老畀以江湖寬俛仰六年間得請兩挂冠鬢  
毛雖蕭颯脚力未蹶跚記書過十張噉飯空一簞開歲



忽兩月感此春事殘杏靨笑牆頭鶯聲入雲端埽地設  
管席相與勸加餐村酒瀉濁清野果嘗甘酸鄰里語蟬  
聯兒孫話團欒雖無萬錢筮浩歌有餘歡

幽居春晚

雲歸禹穴賞新晴酒買蘭亭散宿醒竹帶鞭移俄盛出  
鶴全窠買已長鳴故山雖媿收身晚外物元如脫髮輕  
只恐村鄰成間闊杖藜隨處叩柴荆

又

老廢讐書病廢詩  
畫閒惟與睡相宜  
未尋內史流觴地  
又近龐公上塚時  
花發遊蜂喧院落  
筍長馴鹿入藩籬  
石蛇山下春如許  
野老來招不用辭

梅花過後遊西山諸菴

乞得身歸喜滿顏  
柴門雖設不曾關  
無如梅作經年別  
且就僧分半日閒  
樵斧曉穿雲外去  
釣船夜向月中還  
君看老子無窮樂  
一笑知非造物慳

梅仙塢花湮觀桃李

妖妍天遣占年華歎息人間有許花十里織成無罅錦  
半天留得未殘霞欲題直恐無才稱不見何由信客誇  
醉後又驚春事晚湖堤煙柳已藏鴉

家園賞花

白首扁舟返舊邦逢春直欲倒千缸紅雲夾路薔薇障  
翠羽成層薜荔幢鶯語枝頭常盡日蝶迷葉底不成雙  
閒人爛醉尋常事中聖先判卧北窓

聞金谿陸伯政下世

久矣望來使潛然開訃書兩家通絕譜千里泣靈車亦  
悟古皆死所悲天祝余泉扃生氣在故不羨曹蜍

一春風雨大半有感

忽忽春將老寒暄尚未齊雨昏雞唱晚風惡鵲巢低寫  
物才殊退尋芳思欲迷餘年不須較只是死秦稽

山行贈野叟

垂白哀翁住道邊突間猶喜續炊煙壁如龜茨難占卜  
瓦似魚鱗不接連幼學及時兒識字官租先衆吏無權

與君俱長宣和日握手相看一悵然

又

莫笑孤村生理微茅茨煙火自相依客來旋埽青苔榻  
日在先關白版扉婦女憂蚕租葉去兒童耘麥荷鋤歸  
散人世襲江湖號剝欲溪頭借釣磯

雲門道中

川靄林扉翠欲浮散人心事寄沙鷗莫投野店孤煙起  
曉涉清溪小蹇愁嶺路窮時縈細棧山形缺處起重樓

釣游陳迹渾如昨一念悽然不自由

讀書有感

洙泗諸生尊所聞豈容兀者亦中分焚香競欲愚黔首  
亡史誰能及闕文吾道固應千古在幾人虛用一生勤  
世間倚相何曾乏會與明時誦典墳

六言雜興

世界菴摩勤果聖賢優鉢曇花但解折衷六藝何須和  
會三家

又

夢裏明明周孔胸中歷歷唐虞欲盡致君事業先求養  
氣工夫

又

語道無如孔孟佛莊雖似非同倘有一人領會何須客  
滿坐中

又

失馬詎知非福亡羊不妨補牢病裏正須周易醉中却

要離騷

又

舉足加劉公腹引手拊孫郎鬚士氣日趨委靡賴有二  
君埽除

又

廣平作梅花賦少陵無海棠詩正自一時偶爾俗人平  
地生疑

又



瘦馬羸僮道路清泉白石山林常得有衣換酒不愁無  
法燒金

又

一夜雨來可怖五更雲散無餘傳舍僧窓雖異不妨隨  
處觀書

又

熟讀大小止觀精思內外黃庭直使超然有得豈若淵  
源六經

春晚出遊

風急名花紛絳雪  
土鬆香草出瑤簪  
且呼野艇西村去  
未必微雲便作陰

又

王孫草生與階齊  
女郎花發乳鶯啼  
街頭賣酒處處賤  
信腳覓醉無東西

又

柳暗人家水滿陂  
放翁隨處曳筇枝  
村深麥秀蠶眠後

日暝鳩鳴鵲乳時

又

禹吾無間聖所歎治水殆與天同功三千年事一炊頃  
窈石嵯峨煙靄中

又

岌岌高丘近道邊寂寥翁仲卧荒煙生前意氣今何在  
寒食無人挂紙錢

又

鳴機裂素製春衣  
煮酒香清雁鶩肥  
倒社相呼共行樂  
三搥鼓近是船歸

劔南詩豪卷五十六

欽定四庫全書薈要卷一萬五千五百四十七

集部

釵南詩彙卷五十七

宋 陸游 撰

北窓

老人日夜哀臥起常在背窓間一編書終日聖賢對東  
臯客輸米粲粲珠出碓南山僧餉茶細細雪落磴吾兒  
亦解事稀甲自鉏菜一飢既退舍百念皆卷旆閒身去  
俗遠澄念與道會宿痾走二豎美睡造三昧挂冠反布

韋上印謝銀艾庭中石蒼然此客真度外

幽居雜題

開歲頻風雨清明氣始和遊山書半廢耽酒睡常多客  
去孫登歎牛疲甯戚歌餘生猶有幾盡底付漁蓑

又

雅意元知止遄歸喜遂初久閒棊格長多病釣徒踈漬  
藥三升酒支頭一束書兒曹看翁嬾切勿厭蝸廬

又

忽忽年光逝悠悠世事非曉猶明績火晝永啓漁扉  
施食禽魚熟疏溝杞菊肥寂寥何所歎父子自相依

又

獨往成初志安居謝世紛名書硬黃紙古硯熨焦紋  
雨作占琴薦風來散鷺羣豈無朝市事塞耳未曾聞

題旅舍壁

泥淖停牛屋風埃坐簣牀絳人難諱老楚客自嫌狂  
浪迹江湖大回頭日月長村村有餅餌正可不費糧



又

地曠風號木天高日脫雲村名步頭換縣界驛前分蒿  
艾春侵路雞豚莫識羣敲門就炊爨一飯敢忘君

出行湖山間雜賦

老入新年健春逢小雨晴偶因尋酒去又作繞村行塘  
水蒼鵝戲郊原黃犢鳴閒身有樂事倚杖看農耕

又

新釀學鵝黃幽花作蜜香客邀閒即去病起醉何傷野

寺無晨粥村伶有夜場  
吾心靜如水隨事當年光

又

徑繞茶岡北橋連茭浦東  
蟲鏝烏柏葉露溼猗薺叢燒  
地春蕪綠漁扉夕照紅  
君恩那可報惟是祝年豐

又

魚市樵風口

樵風溪  
港名

茶村穀雨前柳邊煙掩苒堤上草

芊眠墓埽鴉銜肉人歸鷺導船  
東風吹短髮得句為誰  
妍

上巳

殘年登八十佳日遇重三簾幙低新燕房櫳起晚蠶名  
花紅滿舫美醞綠盈甌春事還如昨哀懷自不堪

筍絕句

列仙閱世獨清癯雪谷氷谿老不枯輸與錦裯孩子輩  
千金一束入天廚

贈蘇召叟

蘇子出儔輩翩如天際鴻才華刮眼瞋文字愈頭風豈

止千人見真當四海空老夫雖耄矣此論不妨公

贈趙去華

趙子毫端萬斛珠眼前百輩不枝梧盛名豈待他年見  
公論何曾一日無我老杜門惟足睡君豪折簡固難呼  
此詩強欲相題目堪笑哀翁膽滿軀

道室述懷

養心功用在還嬰肯使秋毫有妄情二寸藤冠狂道士  
一編蠹簡老書生狐妖從汝作人立金價在吾如土輕

地肺終嫌近朝市明年汴峽上青城

春晚雨中作

冉冉流年不貸人東園青杏又嘗新  
方書無藥醫治老風雨何心斷送春  
樂事久歸孤枕夢酒痕空伴素衣塵  
畏途回首濤瀾惡賴有雲山著此身

晚行湖上

飽來捫腹繞村嬉北陌東阡信所之  
女手采餘桑鬱鬱煙蕪生遍冢纍纍  
高林日暮無鶯語深巷人歸有犬隨

東走郡城逾十里好風勞送角聲悲

欲卜菴居未有勝地作詩識之

破裘百結鬢垂蓬旋過流年旋已空  
魔眷屬如雲盡散性光明似日方中  
極知萬事不勞問欲住一菴誰與同  
會向巢居明月夜五弦橫膝寫松風

東窓遣興

東窓徙倚當閒遊水長池魚自滿  
溝花氣襲人渾欲醉鳥聲喚客又成愁  
百年光景輸欹枕萬里風煙入倚樓

欲寫烏絲還嬾去詩名老去判悠悠

獨酌

一榼芳醪手自斟從來戶小怯杯深已於醉醒知狂聖  
又向淳漓見古今濡首固非吾輩事達生猶得昔人心  
醪醪欲過香差減且據胡牀坐綠陰

舟中作

誤長仙蓬不滿年思容歸老白雲邊草枯病馬停朝秣  
予已納緣水泠鰓魚廢夜眠混俗豈須名赫赫耐嘲唯可腹

便便柯橋梅市花俱好且典春衣醉放顛

哀疾

哀疾憐新鬼狂豪尚故吾  
棊常先客著行不許兒扶硯  
潤閒蟾滴香殘冷鴨爐  
自憐風味在尚欲泛江湖

示兒

聞義貴能徙見賢思與齊  
食嘗甘脫粟起不待鳴雞  
蕭索園官菜酸寒太學廩  
時時語兒子未用厭鉏犁

野興



溪漲侵菴路山光壓釣磯荒畦荷鉏去小艇載犁歸世  
態那堪看吾言可自違從今謝人事終日掩荆扉

閒遊

遊徧名山日月長結廬歸占水雲鄉醉中即是逃名地  
閒外應無度世方檜蜜滿脾餘小苦术苗浥露有奇香  
肺腸自與人間別堪笑醅缸與飯囊

又

高會揮金媿二疎食貧只似布衣初終年老健緣儲藥

隨分窮忙為著書  
弔古何時過梁宋  
題詩且欲徧衡廬  
不須更擬乘風去  
水有煙帆陸筍輿

又

過盡僧家到店家  
山形四合路三叉  
清明漿美村村賣  
穀雨茶香院院誇  
困卧幽窓身化蝶  
醉題青壁是棲鴉  
夕陽不盡青鞋興  
小立風前鬚脚斜

又

夙興蓐食戒山行  
策蹇迢迢過故城  
露葉未乾明曉日

風蒲初勁借秋聲綠陰渡口孤鶯語白水陂頭兩犢耕  
遙望炊煙疑可憩試從行路問村名

炊米不繼戲作

敢羨晨興費萬錢口邊縱理信前緣高年雖獲殿諸老  
一飽常如登九天架上有書吾已矣甌中無飯亦陶然  
蓬門一閉還旬日實怕閒人攪晝眠

算行

志士能輕萬戶封野人自愛一枝筇行窮綠岸呼船渡

糴得黃梁就碓舂林外人家明遠火月邊僧閣下疎鐘  
江村不用愁孤絕小店茅簷儘見容

小雨

小雨過巖扃殘雲傍野亭花光相映發鶯語苦叮嚀舉  
酒和神氣彈琴悅性靈索居朋友絕得句遣誰聽

又

急雨方侵幔斜暉忽滿廊塵清添草色衣潤省篝香婦  
織將收繭農功已下秧諸孫入家塾親為授三蒼

送辛幼安殿撰造朝

稼軒落筆凌鮑謝退避聲名稱學稼十年高卧不出門  
參透南宗牧牛話功名固是券內事且葺園廬了婚嫁  
千篇昌谷詩滿囊萬卷鄴侯書揀架忽然起冠束諸侯  
黃旗皂纛從天下聖朝仄席意未快尺一東來煩促駕  
大材小用古所歎管仲蕭何實流亞天山挂旆或小須  
先挽銀河洗嵩華中原麟鳳爭自奮殘孽蛇豕何足嚇  
但令小試出緒餘青史英豪可雄跨古來立事戒輕發

往往讒夫出乘罇深仇積憤在祁連不用追思灞亭夜

初夏

白白簃筒美青青米果新

蜀人名粽為簃筒吳中名粳粒為米果

哀遲重

時節薄少遍鄉鄰梅市花成幄蘭亭草作茵極知歡意盡強起伴遊人

自警

放翁原憤憤祖歲復駸駸社櫟終無用秋蟲漫苦吟拍蚊違殺戒引水動機心老耄誰規我忠言抵萬金

枕上

病叟少安枕驚禽無隱棲慵占賈誼鵬空感祖生雞野  
勢風號北窓痕月過西元非破賊手只合架牛犁

山中  
惟泉

鳴終夜雞三鳴後  
聞架犂則旦矣

野步至近村

耳目康寧手足輕村墟草市徧經行孝經章裏觀初學  
麥飯香中喜太平婦女相呼同夜績比隣竭作事春耕  
勿言野饁無鹽酪筍蕨何妨淡煮羹

書懷示子通

平生山林幾緼屐何意隨人戴朝幘口言報國直妄耳  
斷簡圍坐晨至夕道山堂東直廬冷手種疎篁半窓碧  
但虞風波起平地豈有毫髮能補益成書朝奏暮請老  
入耳幸免煩言嘖東望故山百餘里父老歡忻來接迹  
白羊綠酒爭下擔長笛腰鼓紛如織迢迢梅市過魯墟  
觀者所至空巷陌爾來呻吟又春盡周視室中惟四壁  
但令糲飯麤撐住猶勝朱門常蹢躅小兒助我理孤學



終歲伏几心如石問看飲酒詠離騷何似焚香對周易  
三月三十夜聞杜宇  
斗轉春歸不自由韶華已逐水東流子規獨抱區區意  
血淚交零曉未休

夜大雨連明晨起乃知之

黃紬被穩枕慵移夜雨淋浪了不知水長壞陂初復後  
鳩鳴去婦却還時芳蹊入夏多青子白髮今年有黑絲  
剝欲披衣湖上去滿村芳草正離離

聞北亂次前輩韻

中原昔喪亂豺虎厭人肉輦金輸北庭耳目久習熟不  
知貪殘性搏噬何日足至今磊落人淚盡以血續後生  
志量薄誰辦新亭哭藝祖有聖謨嗚呼寧忍讀

藝祖嘗  
為大宗

一統四字賜大

臣今藏秘閣

壯士吟次唐人韻

士厭貧賤思起家富貴何在髮已華不如為國戍萬里  
大寒破肉風卷沙誓捐一死報天子兜鍪如箕鎧如水

男兒墮地射四方安能山棲效園綺塞雲漠漠黃河深  
涼州新城高十尋風飧露宿寧非苦且試平生鐵石心

哀疾

哀疾猶能飯一簞蓴絲菰首亦加餐舊叨刻印俄銷印  
老媿彈冠亟挂冠自怪嵇康如許嬾人憐范叔不勝寒  
得錢剝買青芒屨采藥名山興未闌

書日用事

左右數書冊朝夕一草堂家貧自能儉病愈不求方盛

饌豚肩美常庖筍茁香園丁報花坼亦復命壺觴

又

一裘良已暖半菽可無飢養氣戒多語端居如有思  
私心須自勝已過遣誰知耄齒尤當勉常憂寸晷移

初夏出遊

去去衝朝霧行行弄夕霏移秧晴竭作坐社醉扶歸  
細草迷行徑殘花點釣磯犢牛將犢過雄雉挾雌飛  
野寺煙鐘遠村墟績火微諸孫殊可念相喚候柴扉

初夏晝眠

好景逢初夏閒身得晝眠書橫竹架上冠墮素屏前葱  
蒨小山桂潺湲幽竇泉危巢出乳燕高樹集新蟬强健  
關天命逍遙近地仙晚窓思茗飲自取雪芽煎

農事稍閒有作

架犂架犂喚春農布穀布穀督歲功黃雲壓檐風日美  
綠針挿水霧雨濛年豐遠近笑語樂浦漲縱橫舟楫通  
東家築室窓戶綠西舍迎婦花扇紅我方祭竈徹豚酒

盤箸亦復呼鄰翁客歸我起何所作孝經論語教兒童  
教兒童莫忽忽願汝日夜勤磨礪烏巾白紵待至公

夜雨

算雨蕭蕭集瓦溝空階點滴送清愁何由乞得須臾睡  
直到窓明滴未休

朝晴

宿雨初收雲四歸小山草木麗朝暉翩然雙鵲從簷下  
言語分明訴溼衣

北窓

簾影參差午漏前  
盆山綠潤雨餘天  
詩無傑句真哀矣  
酒借朱顏却悵然  
海燕理巢知再乳  
吳蠶放食過三眠  
名泉不負吾兒意  
一掬丁坑手自煎

子虞寄惠山泉丁坑蓋日鑄流亞也

遊山戲作

晚境頻辭祿窮居旋學耕  
量哀添酒敵才盡減詩名風  
月成交友溪山管送迎  
登車雨先止天豈相吾行

遣興

聒聒鳴鳩莫笑渠百年我亦旋枝梧病知藥物難為驗  
老覺人間不足娛茆屋何妨度寒暑蔬餐且可遣朝晡  
釣船一出無尋處千頃江邊雪色蘆

又

老荷君恩許醉眠散人名號媿妨賢久叨物外清閒福  
麤識詩中造化權風月四時隨指顧乾坤一氣入陶甄  
新秋更欲浮滄海卧看雲帆萬里天

細雨



細雨重雲漸入梅陰陰門巷長新槐壯心已與年俱逝  
脫髮應無術可裁美睡常嫌鶯喚起清愁却要酒闌回  
年來百事非平昔信手題詩嬾剪裁

初暑

槐陰清潤麥風涼一枕閒眠晝漏長山鵲喜晴當戶語  
海桐帶露入簾香酒緣久病常辭酌茶為前銜偶得嘗  
雲北雲南動遊興速呼小豎治輕裝

夙興

夙興短蓬髮幽步豁煩襟翠碧停闌角顰黃語柳陰書  
殘頻補緝琴廢細追尋未是全無事猶堪養道心

新堂

湖上新堂氣疎豁三面嵐光翠如潑都門歸來病相屬  
鄰里怪我間何濶尊絲作羹飯雕胡厨人所繪藝絕殊  
何由喚得左元放銀盤釣出松江鱸

即席

穉荷出水榴花開長笛園輦送舉杯村鄰相樂君勿笑

要是安健無凶災

又

醉中起舞遞相屬坐上戴花常作先  
要知吾輩不凡處  
一吸已乾雙玉船

又

長魚腹腴羊臂臠饒想久矣無秋毫  
今朝林下煨苦筍  
更覺此君風味高

又

小山榴花照眼明青梅自墮時有聲柳橋東岸倚筇立  
聊借水風吹宿醒

生涯

久矣冥行墮嶮巖樂哉偶得謝招麾放懷身世相忘地  
夙駕山林獨往時縱老豈容妨痛飲更慵亦未廢新詩  
超然自喜生涯別始歎龜堂見事遲

落花

桃李擅春事酴醾為之殿豈不欲周旋過日如掣電大

風連三月吹盡無餘片留之宜有策佇立情眷眷空令  
腸九回竟欠語一轉流年付芳草樽酒孤勝踐鶯聲入  
碧雲簾影滿深院消搖綠陰間風流屬團扇

四月廿二日微雨中次前輩韻

語訛覺齒疎冠倒感髮稀屢為曼容免遂賦淵明歸今  
日天氣佳雨絲弄斜暉起居惟所適單複時易衣出遊  
叩僧廬歸卧掩漁扉一笑顧兒子正爾良未非

夜雨

點滴茅檐雨長宵不肯晴殘釭待雞唱倦枕厭泉鳴已  
踐衰殘境況兼羈旅情晨興亦何事椎髻繞廊行

夏日

入戶桐陰漸覆牀乍敷笛簟北窓涼  
筇枝倚壁知身健  
衣焙殘香覺日長  
雨霽斷雲時聚散  
風來纖草久低昂  
蝶衣粉溼猶飛嬾  
小駐闌干就夕陽

久雨

梅子青青苦未黃  
經旬積雨欲頽牆  
蠹生書帙時須火

潤入衣篝剩得香鄰舍相逢驚問濶通宵不寐聽淋浪  
定知又發韓公笑有底鳴蛙兩股長

又

梅天一日幾陰晴對酒無聊醉不成巧歷莫能知雨點  
孤桐那解寫溪聲林深鳥爵來無數草茂鋤耰去即生  
明日雲開天萬里御風吾欲過青城

舟中

青楓湖上村綠蓑舟中客雲興山疊見海近地勢坼悠

然滄洲趣宛與塵世隔雖云食不足羸免婚嫁責渥丹  
未辭鏡衰白幸滿幘明當鼓枻行放浪窮七澤

繫船

高樹滴殘雨叢蘆生夕風情遊貧有自老鈍學無功歲  
月詩編裏江湖旅色中煙村繫船處邂逅得漁翁

復雨

催喚兒童掃綠苔長歌清嘯興悠哉林間子墮知梅熟  
水面痕生驗雨來往事已成孤枕夢故人誰共一樽開



自憐未負年華在素扇團團月樣裁

書適

清和巷陌單衣後綠潤軒窓午餉餘曲曲素屏圍倦枕  
斜斜筠架閣殘書松陰坐石閒看鶴山寺尋僧晚跨驢  
此段家風君試看京塵撲帽獨何歟

村社禱晴有應

叢祠牲酒走村村賴是龍歸為解紛爽氣收回騎月雨

俗謂二十四五間有雨往  
狂輒成霞涼謂之騎月雨  
快風散盡滿天雲數峯縹緲

如屏面一浦連漪作簟紋猶勝楚人簫鼓裏九歌哀怨  
下湘君

題北窓

東擔還山讀舊書斷編終日見唐虞千莖白髮年華速  
一點青燈夜漏徂厚價異時空市骨大呼從昔不成盧  
細思天賦原非薄跬步門前萬頃湖

又

不嗔人作腐儒看斷簡堆中興未闌更事愈懷憂國切

苦心始覺著書難  
流泉激激人聲遠  
修竹蕭蕭暑令寒  
四海諸公常共處  
北窓何地著身寬

畫坐聞牆外人聲殊壞幽思戲作

老人氣衰凋髮齒  
歲月翩翩來有幾  
晨興食米不一溢  
日課讀書猶十紙  
雖云喧寂無二觀  
終嫌蜩螗喧吾耳  
亟起振衣欲出門  
赤日當空汗如洗  
撥灰未炷瓦爐香  
汲井先換銅匱水  
也勝太史落南時  
短檠夜對屠牛机

黃魯直自言遷宜州時夜寓市中  
直屠牛之机用雞毛筆作字

晨起行園中

老病厭囂煩晨興步小園草深移舊路竹茂失頽垣未  
暇從魚樂惟思與石言人家尋每得拄杖印苔痕

葺舍

蟻知將雨先移穴燕護新雛迭守巢補漏支傾吾可笑  
呼奴垂屋更添茅

次韻和伯玉登卧龍

一紙臨門喜欲顛詞源滾滾瀉長川旗旄外闔新元帥

風月名山古洞天自笑屏居依近郭每煩登望指孤煙  
雄篇三復空興歎窮乃工詩似不然

道室雜詠

精神有限惟當嗇造化無心不汝私此事安須知決擇  
鷄鳴勿後老人期

又

黃褐長條七尺身袖中一劍隱紅塵城門萬屨日來往  
衆裏安知無此人

又

冰霜難與夏蟲語晦朔豈容朝菌知  
怱怱至前能小忍  
人人券內有期頤

又

萬法元須一理通長生極治本同功  
廣成千歲無他術  
祇在唐虞二典中

又

莫緣侯印學陰謀生世惟須一釣舟  
輕用鎔鋸終折缺

善刀何止解千牛

又

放翁老齒猶朱顏一物不留方寸間已吞八九雲夢澤  
更著百億須彌山

湖塘夜歸

漁翁江上佩笭箬一卷新傳范蠡經鬱鬱林間桑椹紫  
芒芒水面稻苗青雲邊築舍分南北陌上逢人半醉醒  
莫恨西村歸路遠行前點點有飛螢

東軒

僻巷地無喧  
閒人慮不煩  
刺舟回北渚  
岸幘倚東軒  
乳鵲行苔徑  
馴顰觸筍藩  
作勞憐野老  
喚取倒清樽

夏日

例謝門前客  
深藏篋裏書  
衣穿但重補  
飯足不求餘  
山溜鳴庭際  
藤陰接屋除  
何勞厭三伏  
俯仰即秋初

斫膾

玉盤行膾簇  
青紅輸與山  
家淡煮菰  
要識坐堂哀  
穀鯨



試來臨水看噉喁

野飯

六十日白可續飯三千年清何與人堪笑此翁頑似鐵  
還山又食一番新

村酒

亂山落日漁歌長平時遠風粳稻香酒旗搖搖截官道  
歸家未遲君試嘗

避雨

雲如壞山欲塞海樹似奇鬼將搏人急投民家雨隨至  
燎衣不覺雞唱晨

雨中短歌

昨夕雨大如車軸今旦雨細如牛毛人言愈細愈澤物  
天公為此非徒勞泥深入市路欲絕壞簷敗壁風蕭騷  
豈惟鼃龜矜得意坐覺藜莠無由薍剝牀供爨嗟婢子  
持傘上學憐兒曾村場酒貴賒不得且解布囊尋弊袍

散懷

少年已遂遊山林何況霜毛兩鬢侵  
習氣尚存詩入夢病根未去藥關心  
猿知秋近啼先苦鶴閱年多頂漸深  
不忍頓踈風月在麤能扶杖即登臨

南堂

空堂寂寂暑氣清祗有燕雀無人聲  
雲頭忽移簾影失雨點亂集荷盤傾  
溝坑水溢魚鼈喜庭戶風送蛟龍腥  
衣巾汗垢為一洗呼奴舉榻臨前楹  
取泉石井試日鑄吾詩邂逅亦已成  
何由探借中秋月與子同遊白玉京

門屋納涼

機裂齊紈如素月牀敷蘄簟起微瀾行人遠不分眉目  
過鳥高猶響羽翰新長庭槐夾門綠無窮陂稻際天寬  
今年項里楊梅熟火齊驪珠已滿盤

幽居

孤村野徑不曾鋤惡草從來一寸無每為遊魚疏港瀆  
更緣啼鳥植楸梧閒門猶有僧時到殘產渾無賦未輸  
浪走人間真誤計算年猶足補東隅

露坐

殘月久方上幽花時自零  
風枝驚宿鳥露草溼流螢  
浩氣吞雲夢危途塞井陘  
菱歌何處起及我醉初醒

暑中久不把酒盆池千葉白蓮忽開一枝欣然小酌因賦絕句

千葉芙蓉白玉膚一樽沆瀣碧琳腴  
極知俱出氛埃外我亦秋風山澤臞

又

我讀淵明止酒篇知渠未識玉池仙誰言見面無多子  
高壓天魔萬二千

劔南詩豪卷五十七

謹案卷五十七第三頁後五行雪谷氷谿老不枯  
輸與錦裯兒子輩刊本枯訛輸輸訛枯今改







總校官庶吉士臣張能照  
校對官庶吉士臣翟槐

膳錄監生臣姚鍾英